

**Datum: 14.09.2020.**  
**Broj: 02-06-801**

*Svim medijima, dostavlja se*

## **KORUPCIJA I COVID-19: Građani najviše prijavljuju korupciju u humanitarnoj pomoći, primjeni karantenskih mjera i pružanju zdravstvenih usluga**

*U BiH su od početka pandemije uočena masovna kršenja ljudskih i radničkih prava, nezakonite nabavke medicinske opreme, a primijećene su i zloupotrebe pri dodjeli ekonomske pomoći.*

**Berlin, 14. septembar 2020.** – Transparency International (TI) je putem svog Centra za pružanje pravne pomoći u borbi protiv korupcije (Centar) od januara primio više od 1500 prijava korupcije i drugih nepravilnosti u vezi sa pandemijom COVID-19.

Pored Bosne i Hercegovine, Centar djeluje u 60 zemalja u kojima su građani svjedočili podmićivanju, povlašćenom tretmanu i drugim oblicima korupcije pri dostavi humanitarne pomoći, primjeni mjera ograničenja slobode kretanja i putovanja, ali i pri testiranju i pružanju zdravstvenih usluga kao odgovor na COVID-19.

„COVID-19 nije samo zdravstvena i ekonomska kriza. To je i kriza korupcije“, rekla je Alison Matthews programski menadžer TI za pružanje pravne podrške. Prema njenim riječima najviše su pogođene najranjivije grupa društva kao što su zdravstveni radnici koji su na prvim redovima borbe ove krize. Primjetno je kako su upravo zbog korupcije vlade širom svijeta zakazale u zadatku da pruže pomoć i neophodne usluge onima kojima je to najpotrebnije u vrijeme pandemije.

Transparency International u Bosni i Hercegovini (TI BiH) je zbog COVID-19 krize podnio krivične prijave protiv odgovornih u zdravstvenom sektoru zbog sumnji u nezakonite nabavke medicinske opreme. Zabilježeni su slučajevi kršenja ljudskih prava i sloboda, ali i masovna kršenja prava radnika naročito u pogledu zdravstvene i socijalne sigurnosti radnika. TI BiH je pomogao privatnim predškolskim ustanovama čiji vlasnici su bili diskriminirani prilikom raspodjele obećane ekonomske pomoći te je spriječena praksa zloupotrebe ličnih podataka zaposlenih u javnom sektoru koji se nisu htjeli odreći svojih ličnih primanja radi sprovođenja posebnih ekonomskih mjera.

„Građani često koriste TI Centar za pružanje pravne pomoći u borbi protiv korupcije kao posljednje sredstvo. Zvanični kanali prijave korupcije su često neefikasni i nesigurni, a oni koji budu prijavljeni nerijetko ostaju nekažnjeni. Naš zadatak u TI je da ljudima koji prijavljuju korupciju ponudimo nadu i da ih podržimo u njihovim naporima“, poručila je Matthews.

Iako je korupcija u Bosni i Hercegovini poprimila endemske razmjere, i dalje je veliki broj lica koja nisu kažnjena za svoja nedjela. Kako bi pružio podršku žrtvama i svjedocima korupcije, te ponudio pravnu pomoć građanima, TI BiH je uspostavio besplatnu info liniju 0800 55555 putem koje je moguće prijaviti slučajeve korupcije. Od 2003. godine više od 270.000 ljudi širom svijeta zatražilo je i dobilo podršku TI prilikom prijave korupcije.